

19

I. N. D. N. J. C.  
DISSERTATIO INAUGURALIS  
JURIDICA,  
DE  
USUFRUCTU,

QUAM AUSPICE DEO,

Ex Decreto

*Inclytæ Facultatis Juridicæ*

IN

UNIVERSITATE ARGENTORATENSI,  
PRO LICENTIA,  
SUMMOS IN UTROQUE JURE  
HONORES ET PRIVILEGIA DOCTO-  
RALIA RITE ATQUE LEGITIME  
CONSEQUENDI,

*SOLENNI Eruditorum Censura submittit*

FRANCISCUS ANTONIUS  
QVEFFEMME, Colmariensis,

D. 31. Mart. Anno M DCC XXV.

---

ARGENTORATI,  
LITERIS Viduæ JOHANNIS PASTORII.



D E O,  
PATRIÆ,  
PATRONIS,  
PARENTIBUS  
ATQVE  
AMICIS.



DE  
USUFRUCTU.

THESIS I.



Quandoquidem primas inter cætera juris objecta, partes vindicent sibi materiæ potissimum eæ, quas annexa ipsis præsertim commendat utilitas, potest inde profectò ista, quam pertractandam suscipio, de usufructu, inter priora quoque nec sine fundamento, referri, ac proinde non ineptum videri Dissertationis Inauguralis argumentum, siquidem continua negotiorum humanorum circa utendum, fruendum, ut plurimum occupatio versatur, est autem usufructus, prouti definitionem ejus aptissime tradit *Imperator Noster in pr. Inst. tit. de Usufr.* ut & *Paulus in l. 1. ff. tit. eod.* jus, alienis rebus utendi, fruendi, salva rerum substantia, estque alius causalis, alius formalis, cum vero species prior hujusce loci non sit, hinc exponendæ illi

diu non immorabor , pauca tamen ad simplicem duntaxat ejus intellectum subjiciam , causalis itaque ususfructus appellatur jus , re propria, pro lubitu & arbitrio utendi, fruendi, domino proprietatis competens, hinc ususfructus improprie tantum dicitur, cum nemini possit fundus suus servire, *l. 5. pr. ff. Si ususfr. per.*

## THESES II.

Formalis autem ususfructus, cui ususfructus definitio tantum convenit, jus est à proprietate separatum, à qua certam & distinctam formam habet, ita, ut apud unum sit proprietas, apud alterum vero ususfructus ejusdem rei, & huic proprie servitutis nomen tribuitur, dividiturque in verum, seu proprium, & quasi, seu improprium, proprius ususfructus audit ille, qui constituitur in iis rebus, quæ usu non consumuntur, sed quarum salva manet substantia, sive res sint immobiles, ut prædia rustica & urbana, sive mobiles, ut servi, jumenta, §. 2. *Inst. de Usufr. l. 3. §. 1. ff. eod.* numismatum etiam veterum, aureorum, vel argenteorum, quibus pro gemmis uti solemus, & cæterum hujusmodi, quæ servando servari possunt, verus datur ususfructus, *cit. text. & l. 28. ff. eod.* imò & rerum incorporalium, ex. gr. jurisdictionis, usumfructum constitui nil vetat, quo casu, multæ & pœnæ pecuniariæ, ut fructus jurisdictionis ad fructuarium spectant, quasi ususfructus, sive improprius is est, qui in iis, quæ utendo consumuntur, vel minuuntur, uti

uti sunt vinum, oleum, odores, vestimenta, pecunia, consistit, *dict. §. 2. Inst.* qui proinde abusus potius dici potest, cum hisce rebus quis uti nequeat, salva earum substantia, & licet pecunia usu non consumi videatur, cum semper in rerum natura maneat, expendenti eam tamen perit, cæterum in posteriori isthac usufructus specie fructuariæ rei dominium, in fructuarium transit, *l. 7. ult. & ff. de Usufr. ear. rer.* at vestimento- rum quoque verum constitui usumfructum, non repugnat.

### THESE III.

Præmissis hisce de natura & divisione usufructus, jam ad eos, quibus acquiritur, modos, procedendum videtur, acquirere autem sibi usumfructum potest, quicumque conditionem suam meliorem reddere valet, constituere vero is regulariter, qui dominus est rerum suarum, liberamque earum administrationem habet, idque aut inter vivos, pactis & stipulationibus, aut ultimis voluntatibus, ut puta testamento, vel codicillis, expresse nimirum legando usumfructum legatario, retenta proprietate hæredi, vel contra *l. 3. pr. l. 6. pr. ff. de Usufr.* Constituitur etiam per sententiam judicis, in judiciis scilicet divisi- riis, ut familiæ herciscundæ, & communi divi- dundo, si iudex alii proprietatem, alii usumfru- ctum adjudicaverit. *cit. leg. 6. §. 1. ff. acquiritur* denique usufructus quoque præscriptione longi temporis, *l. fin. in f. C. de Præscript. long. temp.* nec

per nosmet ipsos tantum consequimur usumfructum, sed per eas etiam personas, quas juri nostro subiectas habemus, l. 6. §. 2. ff. de Usufr. ut per servos, l. 74. ff. Quib. mod. usufr. amitt. item per filiosfamilias, ratione peculij adventitij regularis, l. 6. C. de Bon. quæ lib. in pot.

#### THESE IV.

Constituto usufructu, consequens est, ut satisfactio boni viri arbitratu præbeatur ab eo, ad quem id commodum pervenit, quod nullam læsionem ex usu proprietati afferat, ita statuit Alexander Imperator in l. 4. C. de Usufr. quæ cautio fidejussoria nempe iis præstatur, quorum interest, eaque duplex est, altera qua fructuarius cavet, se arbitrio boni viri usurum, & cum usufructus ad eum pertinere desinet, restitutum, quod inde extabit, l. 1. pr. ff. Usufr. quemadmod. cav. & hæc in proprio duntaxat usufructu præstatur, alia est cautio usufructuaria, qua in quasi usufructu, alternative, communiter cavetur, aut de restituenda finito usufructu re, ejusdem bonitatis qualitatis, cujus erat fructuaria, aut illius æstimatione refundenda, quod utramque cautionem attinet, eam usufructuarius quilibet regulariter præstare tenetur, quocunque modo constitutus sit usufructus, l. 1. §. 2. in f. ff. tit. alleg. adeo, ut omnia condici possit, l. 7. pr. ff. eod. nec testator legando usufructum eam in præjudicium hæredis plane remittere queat, cum non testatoris, sed hæredis commodum à lege introductum, con-

concernat, potest tamen per modum alterius legati eum, cui usumfructum legat, cautione liberare testator, si eam jubeat ab uno ex hæredibus suis præstari, *l. 8. ff. de Usufr. ear. rer.* hæres autem eam remittere legatario potest, cum cui-libet juri in favorem proprium constituto, renunciare liceat, *l. penult. C. de Pa&.*

### THESE. V.

Ne tamen ex his cum nonnullis id inferendum censeas, quasi de essentia usumfructus sint modo dictæ cautiones, siquidem certis etiam casibus ab iis fructuarii quidam liberantur, sic enim patri reverentia paterna eum excusante, præstatio cautionis, ratione usumfructus, quo in bonis liberorum gaudet, remittitur in *l. 8. §. 4. in f. C. de Bon. quæ lib. in pot.* ita quoque à fisco, nulla usumfructus legati nomine cautio exigitur, cum fiscus semper præsumatur dives & solvendo, *l. 1. §. 18. ff. Us. leg. seu fideic. servand.* satisdare pariter non cogitur is, cui proprietas ex die, usumfructus pure legatus est, ait *Pomponius in l. 9. §. 2. ff. Usufr. quemadm. casu.* cum hoc casu, alterius non interit, quia certum est, ut ibidem subjungit, ad eum proprietatem, vel ad hæredem ejus perventuram, his addunt & nonnulli donatorem, qui usumfructum sibi in re donata reservavit *arg. l. 62. ff. de Adil. ed.* ne scilicet donator liberalitatis suæ patiatur potnam, quæ sententia etiam cæteris paribus, defendi potest, ac demum in genere, nullus

nullus fructuarius cautionem offerre tenetur, unde & licet præstita ea non sit, quia non petita, fructus nihilominus faciet suos, cum sufficiat, si per eum non stet, quominus satisfidetur, ac petenti satis, moram non faciat, *arg. l. 2. §. 1. ff. quod. leg.*

# THESE VI.

Expositis istis de fructuarius satisfactionibus, id jam explorare lubet, in quo nimirum ususfructus emolumentum consistat, & quousque fructuarii potestas se extendat, quod vero prius attinet, fructus omnes qui ex re usufructuaria ad necessitatem, commoditatem & voluptatem, secundum qualitatem ejus percipiuntur, & percipi possunt, ad usufructuarium pertinere colligitur ex *l. 7. pr. ff. de Usufr.* sive naturales sint ij, sive industriales, aut civiles, quod fructuum ultimi anni, ad hæredes transmissionem respicit, in naturalibus perceptionis, non tamen immaturis fructibus, non obstante *l. 48. §. 1. ff. Eod.* in civilibus autem, cessionis tempus attenditur, unde si prædii urbani usufructus constitutus sit, ut puta ædium, redditus omnes, pensiones atque obventiones ex ædificiis, & areis & cæteris quacunque ædium sunt, consequitur fructuarius dict. *l. 7. §. 1. ff.* si vero prædii usufructum quis habeat, ex gr. fundi, tum quicquid in fundo nascitur, quicquid inde percipi potest, fructuarii est, hinc si apes in fundo fructuarii sint, earum quo-



quoque ususfructus ad fructuarium spectat, inde aucupiorum, venationum, piscationumque reditus suos facit', venari ipsi etiam usufructuario in montibus, vel saltibus possessionis licet, *l. 62. pr. ff. eod.* item, si in fundo sint lapidicinæ, ut cretifodinæ, aut harenifodinæ, his uti quasi bonus paterfamilias, imo auri & argenti, æris & ferri, aliorumque metallorum fodinas inquirere, vel quas paterfamilias instituit, exercere vel ipse instituere potest, si modo nil agriculturæ noceat *l. 13. §. 5. eod.* porro, usufructuarius non modo rei principalis, sed & accessionum, veluti alluvionis, aut insulæ, juxta fundum in flumine natæ, usufructu gaudet, *conf. l. 9. ff. eod.* emolumenta tamen extraordinaria, veluti thesaurus in fundo repertus, siquidem in fructum non computentur, fructuario non cedunt, sed partem eorum dimidiam, quasi in alieno inventorum restituere cogitur, *l. 7. §. 12. ff. sol. matr.* quando autem gregis, vel armenti ususfructus concessus, tunc lac, pilus, lana, usufructuarii sunt, foetus etiam pecudum in fructu comprehenduntur, non tamen partus ancillæ, absurdum enim videtur in fructu hominis esse hominem, cujus gratia fructus omnes rerum natura comparavit, *§. 37. Inst. de Rer. div. l. 68. pr. ff. de Usufr.*

## THESE VII.

Quod ad potestatem fructuarii, eam his verbis proponit *Ulpianus in l. 12. §. 2. ff. eod. usufructua-*

fructuarius inquit, vel ipse frui ea re, (scilicet fructuaria,) vel alii fruendam concedere, vel locare, vel vendere potest, nam & qui locat, utitur, & qui vendit, utitur, sed & si alii precario concedat, vel donet, puto eum uti, ita tamen, ut resolutio jure dantis, jus quoque accipientis resolvatur, causam autem proprietatis deteriores facere non debet, meliorem potest, modo necessariam rei fructuariæ partem huic fructuarius occupaturus non sit, unde usufructu fundi constituto, neque arbores frugiferas excidere, neque villam diruere, nec quicquam in proprietatis perniciem moliri ipsi permittitur, & si forte voluptuarium fuit prædium, viridaria vel gestationes, vel deambulationes arboribus infructuosas opacas atque amœnas habens, non debet deicere, ut forte hortos olitorios faciat, vel aliud quid, quod ad reditum spectat, sed & in locum demortuarum, non vi tempestatis everfarum, vitium, vel arborum, alias substituere debet, & priores sibi retinere potest, *l. 18. l. 58. pr. ff. eod.* at si ædium usufructus sit concessus, *Nerva* filius, & lumina immittere fructuarium posse ait, verum & colores, & picturas, & marmora poterit, & sigilla, & si quid ad domus ornatum, sed neque diætas transformare, vel conjungere, aut separare ei licet, vel aditus posticave vertere, aut refugia aperire, vel atrium mutare, vel viridaria ad alium modum convertere, excolere enim, quod invenit, potest, qualitate ædium non immutata, *l. 13. §. 4. & 7. ff. eod.* Si denique

que gregis ususfructus relictus, hoc casu, in locum defunctorum capitum, alia submittendo, ex agnatis gregem supplere tenetur fructuarius, l. 68. §. 2. ff. eod. unde quodammodo animalia ferrea dici possunt.

### THES. VIII.

Præterea, omne quod diligens paterfamilias facit, fructuarius quoque facere debet, sed quaeritur, in quem impensæ redundant, easque ad usufructuarium spectare deciditur, cum & omnes ad eum fructus perveniant, secundum naturam enim est, ut qui sentit commodum, sentiat & onus, adeo, ut si usufructuarius non faciat expensas, quæ ad eum pertinent, ab usufructu repellatur, quasi non bene utatur, limitatur tamen & restringitur prædicta conclusio ad modicas impensas, non magnas, modica enim refectio tantum fructuario, magna vero proprietario incumbit, l. 7. §. 2. ff. de Usufr. l. 7. C. eod. in qua ita Gordianus Imperator decernit, eum, ad quem ususfructus pertinet, facta testæ suis sumptibus præstare debere, explorati juris est, proinde, si quid ultra, quam impendi debeat, erogatum potes docere, solenniter reposcis, estque ratio, quod modica impensæ temporalem tantum fructuum perceptionem, magna vero, perpetuum rei utilitatem concernere censeatur, quam per consequens in proprietarium, cujus perpetua proprietas est, redundare fas est, census autem, decimas, tributa cæteraque onera realia ex re

fructuaria debita , sicut & collectas atque superindicta solvere fructuarius obligatur , *d. l. 7. §. 2. & l. 28. ff. de Usufr. leg.* nisi tamen specialiter nomine fideicommissi testatori placuisse probetur , hæc quoque ab hærede dari , *l. 52. ff. de Usufr.* aut impositæ indictiones tantæ sint , ut usumfructum absorbeant , dum perceptioni fructuum adæquarentur , siquidem eo casu , nil fructuario residuum foret , quod testator non voluisse præsumitur , *arg. l. 57. ff. de Leg. 1.*

## THESE. IX.

Ne tamen in universum inutilis sit proprietas , semper abscedente usufructu , cum ridiculum foret , dominum rei sine ulla spe , ipsa unquam utendi , fruendi appellari , hinc certis etiam modis extinguitur ususfructus , & ad proprietatem revertitur , certa autem & frequentissima ususfructus meta fructuarii mors est , scilicet naturalis , si alia eam causa non præcurrat , *Ulpianus in l. 3. §. ult. ff. Quib. mod. usufr. amitt.* siquidem ususfructus servitus est personalis , ideoque cum persona cui adheret expirat , unde & *Modestinus in l. 31. ff. de Usufr.* Titio , ait , cum moriatur , ususfructus inutiliter legari intelligitur , in id tempus videlicet collatus , quo à persona discedere incipit , sic & *Paulus in l. 5. ff. de Usufr. leg.* usumfructum cum moriar , inutiliter stipulor , idem est in legato , quia & constitutus ususfructus morte intercidere solet , ergo & si fructuarius u-

sum.

sumfructum legaverit, inutile erit legatum, nisi postea proprietatem nactus esset, refert *Pomponius* in l. 24. §. 1. ff. de Leg. 1. sed quid, si plures sint fructuarii? sane si pluribus in solidum relictus sit ususfructus, mortuos omnes esse oportet, ut ad dominum proprietatis revertatur, idemque in aliis modis finiendi ususfructus, idque propter jus accrescendi, quod inter eos versatur, quod si duobus separatim alternis annis, ususfructus concessus, & ex iis alter decedat, per vices temporum plena proprietas erit, neque enim accrescere alteri quicquam potest, quoniam per propria quisque tempora non concurrente altero, fructus integros habuit ut scribit *Papinianus* in l. 2. pr. ff. Quib. mod. usufr. amitt. porro, ususfructus patri per filium familias acquisitus, filii familias morte non extinguitur, sed penes superstitem patrem remanet, & vicissim, l. fin. C. de Usufr. si vero id in concessione ususfructus expressum, ut ad hæredes transeat, tunc ad primi gradus hæredes, non ad posteriores pervenit, l. 14. C. eod. Non obstante, l. 65. & 70. pr. ff. de Verb. sign. quid autem, si tales usumfructum habeant, qui non moriuntur, veluti civitates, certe, respondit *Cajus* in l. 56. ff. de Usufr. eum saltem finiri lapsu centum annorum, qui finis vitæ longævi hominis est, poterit autem & citius periri, si aliter civitas intercidat, hinc *Modestinus* in l. 21. Quib. mod. usufr. amitt. si ususfructus, inquit, civitati legetur, & aratrum in eam inducatur, civitas esse desinit; ut passa est Carthago,

que quasi morte desinit habere usumfructum; mors autem proprietarii nihil pertinet ad finendum alterius usumfructum, reſcriptis *Imperator Antoninus in l. 3. §. 1. C. de Uſufr.*

### THESE. X.

Ad proprietatem insuper revertitur ususfructus propter mortem civilem, si nempe usufructuarius maximam, vel mediam, capitis diminutionem passus fuerit, *l. penult. §. 2. C. eod.* item amittitur ususfructus non utendo per modum & tempus, uti legitur in §. 3. *Inst. de Uſufr. l. 13. C. de Servit.* olim quidem anno, vel biennio, hodie vero nonnisi decem annis inter præſentes, & viginti inter absentes, non obstante *l. 16. §. 1. C. de Uſufr.* interitu quoque totali rei usufructuarius ususfructus expirat, ita ut usufructu ædium concesso, consumptis ædibus, vel etiam terræ motu, vel vitio suo corruptis, ne aræ quidem ususfructus retineatur, §. 3. *Inst. d. tit. in f. de usufructu gregis* ita habet *Pomponius in l. ult. ff. Quib. mod. usufr. amitt.* cum eousque numerus pervenit gregis, ut grex non intelligatur, perit ususfructus, quod vero existentia diei, vel conditionis, usufructui adjectæ, ususfructus intereat, id per se patet, finitur denique ususfructus etiam, si domino proprietatis ab usufructuario cedatur, nam cedendo extraneo; nil agitur, aut contra, quæ res consolidatio appellatur,